

Tuzla babesguneari eraso diote kanoiez Bosniako serbiarrek

NATOk kideek aliatuen elkartasunari eusteko beharra azpimarratu dute Brusselan

NATOk kideek Brusselan egindako bileran Bosniako gerra irtenbidean jartzeko bide bakarra negoziatzea dela berretsi zuten atzo. Baina fronteetan ez da halako asmorik inondik inora sumatzen. Atzo bertan Bosniako serbiarrek Nazio Batuen babesean dagoen Tuzla herri musulmanari eraso zioten kanoiez.

JONE LARRAÑAGA / DONOSTIA

Gerra giroa Bihac (Bosniako ipar-ekialdea) inguruan berpiztu zen joan den hilaren amaieran, baina dagoeneko errepublika osora zabaldua da. Atzo Tuzlak jasan zuen serbiarren eraso, eta Bosnia iratiak jakinarazi zuenez, gutxienez zibil bat hil zen bertan.

Paul Risley Nazio Batuek Sarajevon duten misioko ordezkariak atzo jakinarazi zuenez, bake indarrek (Unprofor) «gogor egin dute protesta Bosniako serbiarren agintarien kontra», izan ere, Tuzla babesgune izendatutako herria baita. Horrezaz gain, Risleyk «ekintza terroristetan» aritu izana leporatu zien Radovan Karadzicen indarrei Bihaceko jomugan zibilen kontra SA-2 proiektila jaurti baitzuten herenegun.

Inguru hartan gero eta gogorragoak dira alde bien arteko borrokak. Joan den urriaren azkenaldera Armada musulmanak serbiarren kontrolpean zeuden 300 kilometro karratu lur berreskuratu zituen indarrez. Haren



Sarajevoko haurrak gerra jolasetan.

ondotik, serbiarrek gogor ekin zioten kontraerasoari duela hamar egun. Eta NBeko ordezkariak atzo jakinarazi zuenez, galdutako lurren % 90 eskuratu dituzte dagoeneko.

Bosniako serbiarrek Kroaziako Krajinakoen laguntza izan dute kontraerasoan. Azken egunotan, Krajinakop eskualdetik (serbiarren kontrolpean dagoen Kroaziako eskualdea) Bihaceko posizio musulmanei behin eta berriz eraso egin diete, baita airez ere. Gertaeren larritasunaz jabetuta, Unproforreko ordezkariak Franjo Tudjman Kroaziako lehendakaria eta NATOk agintari militar gorenekin bildu ziren herenegun, NATOk aire babesa

Kroaziara ere zabaltzea aztertzeke.

Baina Bihacen eta Tuzlan ezezik, Sarajevon ere tentsio giroa gori-gorian dago. Herenegun nazioarteko behatzaile eta kazetariak bizi diren Holliday Inn hotelari eraso egin zioten posizio serbiarretatik, eta atzo hiriburua zeharkatzen duten tranbiei.

ELKARTASUNARI EUTSI BEHAR

Giroa berriz ere belztu egin da Bosnian, eta gerra aurki irtenbidean jarriko zela sinestu zutenak oker zirela ohartu dira. Hala ere, NATOk errepublika hura bakeitzeko bide bakarra aurrez aurre dauden aldeek nazioarteak era-

tutako egitasmoa onartzea dela azpimarratu zuen.

Atlantiar Aliantzako kideak Brusselan bildu ziren atzo Estatu Batuek Bosniaren kontra agindutako arma enbargoa altxatu izanak ekarriko dituen ondorioak aztertzeke. Herenegun Mendebaldeko Europako Batasunak (MEB) egindakoari jarraiki, NATOk nazioartearen elkartasuna beharrezkoa dela azpimarratu zuen atzoko bileran. «Kontseiluak Aliantzaren barruan elkartasunari eustearen beharra azpimarratu du», azaldu zuen bozeramaile batek.

NATOk aliatuek Batzorde Militarrek prestatutako txostena aztertu zuen ezohiko bilkuran.

Reynoldsek Dublingo gobernu koalizioari eusteko dei etsia egin die laboristei

DUBLIN

Albert Reynolds Hego Irlandako lehen ministroak Dublingo gobernu koalizioa salbatzeko ahalegin desesperatua egin zuen atzo. Alderdi laboristari joan den igandean egindako mehatxua bertan behera uzteko eskatu zion gobernuburuak, eta aurrerantzean ere Gobernuan jarraitzeko eskatu.

Parlamentuan egindako hitzaldian Reynoldsek azpimarratu zuenez, lastima litzateke hazkunde ekonomiko handia lortu eta azken 25 urteotan Ipar Irlanda baketzeko aurrerapauso handiena eman duen Gobernu

«gaizki-ulertze bategatik» bat-batean hankaz gora botatzea.

Hego Irlandako lehen ministroa joan den ostiralean lehertu zen krisiaz mintzo zen. Orduko hartan, Dick Spring gobernuburuordea eta gainontzeko ministro laboristak Gobernu egiten ari zen bileratik irten egin ziren, Reynoldsek Auzitegi Goreneko lehendakaria Harry Whelehanek izan behar zuela esan zuenean. Laboristak izendapen horren aurkakoak ziren, Whelehanen joera kontserbadorea ezaguna baita oso.

«Benetan, asko sentitzen dut nahigabe lehen ministrordeari eta bere kideei egindako mina»,



Albert Reynolds.

azpimarratu zuen, Springek batik bat Ipar Irlandako bake prozesuan egindako lana goraipatu aurretik. Lehen ministroak azpimarratu zuenez, nazioaren interesen onerako beharrezkoa da Gobernuak bere horretan jarraitzea.

ZENTSURA MOZIOA AURKI

Baina atzo iluntzean, Springen erantzuna falta zen koalizioak aurrera egingo duen jakiteko. Whelehanen izendapenaren ondoren, buruzagi bien arteko ezadostasunak handitu egin dira, eta askok iritzi diote hauteskunde aurreratuak egitea beste erremediorik ez dela izango.

Palestinarren «batasuna» eskatu du Arafatek

GAZA

Iasser Arafat Aginte Nazional Palestinarreko lehendakariak bere herriko sektoreen «batasuna» eskatu du «gure Estatu subiranoa eraki ahal izateko». Eskatza hori atzo egin zuen, Gazako Jarnuk estadiogan eman zuen hitzaldian.

Palestinako Estatu aldarrikatu zela sei urte bete ziren atzo eta egun hori ospatu nahian, jaialdi bat egin zuten atzo Jarnuk estadiogan.

Bederatzi mila lagun inguru bildu ziren jaialdi horretan eta Iasser Arafatek bere hitzaldian esan zuenez, «batasun nazionala ezinbestekoa da kanpotik etorriko diren erronkei aurre egin eta gure Estatu subiranoa eraiki ahal izateko».

Arafatek adierazi zuenez, «guk egin beharreko bidea luzea eta zaila izango da, eta horregatik, hain zuzen, guk guztiok elkartu egin behar dugu Jerusalem hiriburu izango duen gure Estatu eraiki ahal izateko».

Jerusalem 160.000 palestinar inguru bizi dira eta israeldarrak 1.300 inguru dira.

Adierazpen horiekin batera, «Jainkoak nahiko ahal du datorren urtean meskitetan, elizetan eta Jerusalemgo murrutetan Palestinako bandera jarrita dagoela ospatzea egun hau», gaineratu zuen hitzaldiaren amaieran Arafatek.

Palestinako 'Al Quds' eta 'Annahar' egunkari entzutetsuenek, baita Arafaten oposizioko mugimenduek ere, palestinarren batasuna eskatu zuten atzo. «Palestinarrak Estatu independente bat lortzeko bidean dira baina hori lortu ahal izateko luzaro eta gogor lan egin beharko dugu», azpimarratu zuen 'Al Quds' egunkariak.

GAZAN 200 ATXILOTU

Bestalde, Aginte Nazional Palestinarreko segurtasun indarrek Jihad Islamikoko 200 kide baino gehiago atxilotu ditu joan den ostiralean Gazan.

Joan den ostiralean Jihad Islamikoko suizida batek Gazan egin zuen atentatuagatik agindu zituzten atxiloketa horiek egiteko. Atentatu hartan atentatugilea eta hiru soldadu israeldar hil ziren.